

TIENDES BEVRAAGTEKEN – DEEL TWEE

JESUS EN DIE TIENDES

“Wee julle, skrifgeleerdes en Fariseërs, geveinsdes, want julle gee tiendes van kruisement en anys en koljander, en die swaarste van die wet laat julle na: die reg en die barmhartigheid en die trou” (Matt.23:23).

“Maar wee julle, Fariseërs, want julle gee tiendes van kruisement en wynruit en elke groentesoort, en julle verwaarloos die reg en die liefde tot God. Hierdie dinge behoort julle te doen sonder om die ander na te laat” (Luk.11:42).

Hierdie gedeeltes kan nie gebruik word om die betaling van tiendes in die Nuwe Testamentiese kerk te regverdig nie aangesien dit betrekking het op die dispensasie van die Ou Testament. Hier word dit weer duidelik hoe belangrik dit is om die verskil tussen die twee testamente te verstaan. Alhoewel mense die verdeling van die twee testamente tipografies as tussen die einde van Maleagi en die begin van Mattheus sien, is dit nie hoe dit volgens God se Woord verdeel word nie. Van God se kant af gesien begin die Nuwe Testament op die oomblik van Jesus se sterwe aan die kruis:

“...want ò testament is geldig by sterfgevalle, aangesien dit nooit van krag is solank as die testamentmaker nog leef nie” (Heb.9:17).

Matt.23:23 word graag aangehaal om die gee van tiendes te regverdig, maar die hele historiese konteks van die wet van Moses wat nog in Mattheüs 22 en 23 van toepassing was, word geïgnoreer. Verwysend na hierdie Ou Testamentiese wet sê Jesus:

*“Hierdie dinge behoort julle te doen **sonder om die ander na te laat**” (Matt.23:23, my beklemtoning).*

Hoekom word daar op grond van **Mattheüs 23:23** aangedring dat tiendes betaal moet word, terwyl daar nagelaat word om aan te dring dat die **“ander”** dinge betreffende die wet wat in dieselfde vers na verwys word, nie ook onderhou word nie? Dieselfde onkonsekwente metode van Bybeluitleg word gebruik wanneer daar op grond van ò geïsoleerde Ou Testamentiese skrif soos Mal.3:10 aangedring word dat tiendes betaal moet word, maar waar terselfdertyd die hele konteks van die voorskrifte soos in Numerie 18 uiteengesit, geïgnoreer word.

Die ryk jong man (Lukas 18:18-24) en Saggeüs (Luk.19:8)

“Nog een ding ontbreek jou – verkoop alles wat jy het, verdeel dit onder die armes, en jy sal ò skat in die hemel hê; kom dan hier, volg My” (Luk.18:22).

Let op dat Jesus nie sê dat hy alles wat hy het moet verkoop en ò tiende daarvan aan die priesters in die tempel moet gee nie – hy moet die hele opbrengs aan die armes gee! Volgens wat vandag in sommige kringe verkondig word, sou ò mens verwag dat Jesus eerder sou moes beveel het dat dit na die tempel moes gaan. Ook, eerder as om aan die ryk jong man te sê om tiendes te gee, sê Hy vir hom om alles te gee. In ò soortgelyke geval, toe

Saggeüs sê dat hy die helfte van sy goed aan die armes gaan gee, het Jesus hom nie reggehelp deur vir hom te sê dat ñ tiende na die tempel moet gaan nie! **(Luk.19:8)**.

HEBREËRS 7 – DIE HOË PRIESTERSKAP VAN CHRISTUS HET TIENDES AFGESKAF

Hebreërs hoofstuk 7 is die enigste plek in die Nuwe Testament waar daar ná die kruising van Jesus oor tiendes gepraat word. Omdat die meeste van die eerste Christene Jode was, het baie van hulle dit moeilik gevind om skielik met al hulle Joodse godsdienstradisies te breek. Die brief aan die Hebreërs is dan juis geskryf om hierdie probleem aan te spreek. Hulle moes oortuig word dat Jesus as Hoë Priester, veel groter en belangriker as Moses was **(Heb.3:1-6)**. Teen hierdie agtergrond is dit nou maklik om te verstaan wat die skrywer in hoofstuk sewe aan die Hebreërs wil sê. Met Christus as Nuwe Testamentiese Hoë Priester en Middelaar het hulle geen ander godsdienssisteem nodig nie.

Wanneer die sewende hoofstuk van Hebreërs gelees word, is dit belangrik om in gedagte te hou dat dit die tipologiese Melgisedek is wat as voorbeeld gebruik word om aan te toon dat sy priesterorde beter is as die Levitiese. Die woord *“gelykgestel”* wat in Heb.7:3 in die ou Afrikaanse vertaling van die Bybel gebruik word, mag miskien verwarring veroorsaak. In die Nuwe Afrikaanse Vertaling word die woord *“soos”* gebruik, terwyl *“like”* ook in die NIV, NAS en die KJV gebruik word. Die woorde *“sonder vader, sonder moeder, sonder geslagsregister, sonder begin van dae of lewenseinde”* (Ou Afrikaanse Vertaling) verwys na die historiese Melgisedek. Die Nuwe Afrikaanse Vertaling se weergawe van Heb.7:3 maak Melgisedek as skadubeeld van Christus duideliker:

*“Niks is bekend omtrent sy vader en moeder of afstamming of die begin en einde van sy lewe nie. **Hy is soos die Seun van God...**” (My beklemtoning).*

Anders as die historiese Melgisedek, word Jesus se afstamming baie volledig deur geslagsregisters bekend gemaak **(Matt.1:17, Luk.3:23-38)**.

Die feit dat daar van sy herkoms en afstamming niks geweet word nie, diskwalifiseer Melgisedek om ñ priester van die Aäronitiese of Levitiese orde te wees. Onder Mosaïese wet was dit ñ vereiste dat voordat iemand as ñ priester aangestel kon word, sy afkoms van Aäron en Levi deur ñ geslagsregister bewys moes word. In Hebreërs hoofstuk sewe word die bespreking van tiendes net gebruik om aan te toon dat die priesterorde wat met Jesus geassosieer word, groter is as die van Aäron en Levi.

VERANDERING VAN WET

Heb.7:12 – “Want met verandering van die priesterskap kom daar noodsaaklik ook verandering van wet...”

Dit is moeilik om te verstaan hoekom enige bespreking aangaande die hou van die Sabbat en die betaal van tiendes, of enige ander aspek van die Wet, nie met ñ bespreking van **Heb.7:12** begin nie!

“Want met verandering van die priesterskap kom daar noodsaaklik ook verandering van wet.”

Die Griekse woord *metatithemi* wat in bogenoemde teks gebruik word, beteken letterlik om van een toestand na 'n ander te verander (Strong's 3346). *Metamorfose* is 'n Afrikaanse woord wat dié betekenis goed weergee. Die HAT (Verklarende Handwoordeboek van die Afrikaanse Taal) verduidelik die woord se betekenis as om 'n "gedaantewisseling" te ondergaan. In die konteks van ons skrifgedeelte maak die volgende verse dit baie duidelik dat hierdie "verandering" betrekking het op die totale afskaffing van die Levitiese priesterorde en al die wette wat dit ondersteun het:

"As daar dan volkomenheid deur die Levitiese priesterskap was – want met die oog daarop het die volk die wet ontvang – waarom was dit nog nodig dat 'n ander priester moes opstaan volgens die orde van Melgisedek en dat hy dit nie volgens die orde van Aäron genoem word nie?" (Heb.7:11).

"Want met verandering van die priesterskap kom daar noodsaaklik ook verandering van wet..." (Heb.7:12).

Die hele bespreking in die konteks van Hebreërs hoofstuk sewe maak dit duidelik dat die verandering waaroor gepraat word, te doen het met die afskaffing van die Mosaïese wette. Jesus was van die stam van Juda en volgens die ou wet kon Hy nie as priester diens doen nie. Die oomblik toe Hy op die kruis sterf, is die Levitiese priesterskap afgeskaf en vervang met 'n nuwe orde waarvan Jesus die Hoë Priester is. Die bloed van die pasgalam is vervang met die bloed van Jesus Christus en die hoë priester Aäron se plek word deur Jesus Christus ingeneem. Met Jesus se dood en opstanding word die hele orde van die Ou Testamentiese priesterskap ook vervang met die Nuwe Testamentiese priesterskap van alle gelowiges (**1 Pet.2:5,9; Open.1:6, 5:9-10**). Saam met al hierdie veranderinge word die hele tiendestelsel afgeskaf en **met die rentmeesterskapbeginsels van die nuwe genadebedeling vervang**.

Die algehele afwesigheid van enige lering aangaande tiendes in die geskrifte van die Nuwe Testamentiese skrywers kan net daaraan toegeskryf word dat daar in die Nuwe Testament geen so 'n wet voorkom nie; net so min as wat daar 'n wet te vinde is vir besnydenis of vir die onderhouding van die Sabbat.

DIE ALTERNATIEWE SIENING – NUWE TESTAMENTIESE RENTMEESTERSKAP

In plaas van tiendes betaal, is een van die Rentmeesterbeginsels, "om te gee."

Die Onderliggende Beginsels van "Gee"

1. Om te gee is beter as om te ontvang (Lukas 6:38).
2. Jy moet volgens jou vermoë gee (2 Korintiërs 8:12).
3. Nie spaarsamig nie (Markus 12:43, 2 Korintiërs 8:3).
4. Nie uit dwang nie (2 Korintiërs 9:7).
5. Soos elkeen in sy eie hart besluit (2 Korintiërs 9:7).
6. Met beplanning (1 Korintiërs 16:2).

Nick Maartens
 Jeffreysbaai
 0827826074
 nickmaartens@hotmail.com